

佛说大方等修多罗王经 1 卷

No. 575 [Nos. 576, 577]

佛说大方等修多罗王经

后魏天竺三藏菩提流支译

如是我闻。一时婆伽婆。在王舍城迦兰陀竹园。与大比丘僧千二百五十人俱。及大菩萨摩訶萨众。尔时摩伽陀国频婆娑罗王。出王舍城。诣迦兰陀竹园精舍。至世尊所。头面礼足。遶佛三匝。退坐一面。

尔时世尊即告频婆娑罗王言。大王。如人梦中见于众人。与诸婬女共相娱乐。此人觉已。忆念梦中众人婬女。大王。于意云何。如是梦中众人婬女。为有实不。频婆娑罗王答言。不也世尊。佛告大王。于意云何。是人梦中见婬女。与诸人等共相娱乐。觉已忆念。如是之人宁有智不。大王答言。不也世尊。何以故。世尊。梦中毕竟。无有众人及众婬女。众人婬女尚不可得。何况当有共相娱乐。佛告大王。凡夫之人亦复如是。眼见美色便生爱着。既生爱着便起欲心。既起欲心起瞋痴业。或作身业。或作口业或作意业。彼所作业作已而灭。灭已不依东方而住。亦复不依南方而住。亦复不依西方而住。亦复不依北方而住。四维上下亦复如是。至临终时行识将灭。其意现前。大王。如是行识。自作之业必尽受之。大王。如人梦觉。不见婬女及诸人众。行识灭已初识次生。或生天中。或生人中。或生地狱。或生畜生。或生饿鬼。大王。以初识不断自心相续。应受报处而生其中。大王。观诸生灭颇有一法。从于今世至未来世。大王。如是行识终时。名之为灭。初识起时。名之为生。大王。行识灭时。去无所至。初识生时。无所从来。何以故。识性离故。大王。行识行识空。灭时灭业空。初识初识空。生时生业空。观诸业果亦不失坏。大王当知。以初识心相续不断而受果报。尔时善逝。说此语已。而说颂曰。

一切唯名字	唯住想分别
名字分别说	而说无所有
以种种名字	说于种种法
法中无如是	此法诸法相
名字名字空	名字离名字
诸法无名字	以名字而说
此法非实有	以分别而生
彼分别亦无	空以分别说
一切凡夫说	眼能见于色
世间妄分别	取之以为实
佛之所说法	众缘集故见
此是行次第	为说第一义
非眼见于色	意不觉诸法
此是第一谛	非世间所觉

尔时世尊说此经已。摩伽陀国频婆娑罗王。一切世间天人阿修罗捷闷婆等。闻佛所说。皆大欢喜。

## 佛说大方等修多罗王经

---

【经文信息】大正藏第 14 册 No. 0575 佛说大方等修多罗王经

【版本记录】CBETA 电子佛典 Rev. 1.8 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 维习安大德提供之高丽藏 CD 经文, 阎学新大德输入 / Gamblers 大德初校 / 沈介盘大德二校, 北美某大德提供

【其他事项】本数据库可自由免费流通, 详细内容请参阅【[中华电子佛典协会数据库版权宣告](#)】

---